

**Tadbirkorlik subyektlariga
subsidiyalar va boshqa
imtiyozlar taqdim etilishini
monitoring qilish, baholash
hamda asossiz olingan
subsidiyalarni qaytarib olish
tartibi bo'yicha
USLUBIY QO'LLANMA**

Toshkent – 2025

Tadbirkorlik subyektlariga subsidiyalar, imtiyozlar va preferensiyalar taqdim etilishini monitoring qilish, ularning samaradorligini baholash hamda asossiz olingan va maqsadsiz foydalanilgan subsidiyalarni qaytarib olish tartibi bo'yicha uslubiy qo'llanma. T.: O'zbekiston Respublikasi Adliya vazirligi, 2025-yil. – __ bet.

Mazkur qo'llanma O'zbekiston Respublikasida tadbirkorlik subyektlariga subsidiyalar va boshqa imtiyozlarning samaradorligini baholash maqsadsiz foydalanilgan subsidiyalarni qaytarib olish tartibini sodda va ravon tilda tushuntirishga qaratilgan.

Ushbu uslubiy qo'llanma tavsiyaviy xususiyatga ega.

© O'zbekiston Respublikasi Adliya vazirligi, 2025-yil.

MUNDARIJA

Tadbirkorlik subyektlariga subsidiyalar va boshqa imtiyozlar taqdim etilishini monitoring qilish, baholash hamda asossiz olingan subsidiyalarni qaytarib olish tartibi bo'yicha normativ huquqiy hujjatlar	Ошибка! Закладка не определена.
Kirish	2
Asosiy Tushunchalar	2
Qo'llab-quvvatlash choralari taqdim etadigan tashkilotning asosiy vazifa va majburiyatlari	9
Monitoring qilish	Ошибка! Закладка не определена.
Samaradorlikni baholash mezonlari	13
Asossiz olingan va maqsadsiz foydalanilgan subsidiyalarni qaytarib olish tartibi	15
Yakunlovchi qoidalar	17

Tadbirkorlik subyektlariga subsidiyalar va boshqa imtiyozlar taqdim etilishini monitoring qilish, baholash hamda asossiz olingan subsidiyalarni qaytarib olish tartibi bo'yicha normativ huquqiy hujjatlar

O'zbekiston Respublikasining "Tadbirkorlik faoliyati erkinligining kafolatlari to'g'risida"gi Qonuni.	
O'zbekiston Respublikasi Vazirlar Mahkamasining 2025-yil 11-dekabrdagi "Tadbirkorlik subyektlariga taqdim etilgan subsidiyalar, imtiyozlar va preferensiyalardan foydalanish samaradorligini yanada oshirish chora-tadbirlari to'g'risida"gi 784-sonli qarori.	

KIRISH

So'nggi yillarda mamlakatimizda tadbirkorlik faoliyatini qo'llab-quvvatlash, iqtisodiyot tarmoqlarini rivojlantirish hamda yangi ish o'rinlarini yaratish maqsadida subsidiyalar va boshqa imtiyozlar taqdim etish bo'yicha izchil chora-tadbirlar amalga oshirilmoqda. Ushbu qo'llab-quvvatlash mexanizmlari tadbirkorlik subyektlarining moliyaviy barqarorligini ta'minlash va ularning faoliyat samaradorligini oshirishga xizmat qilmoqda.

Shu bilan birga, ayrim hollarda subsidiyalar va imtiyozlardan foydalanishda belgilangan talab va shartlarga rioya etilmasligi, ajratilgan mablag'larning maqsadsiz yoki samarasiz sarflanishi holatlari kuzatilmoqda. Bu esa ularni monitoring qilish, baholash hamda nazorat mexanizmlarini takomillashtirish zaruratini yuzaga keltirmoqda.

Adliya vazirligi tomonidan tayyorlangan uslubiy qo'llanma tadbirkorlik subyektlariga taqdim etilayotgan subsidiyalar va boshqa imtiyozlar ustidan monitoring olib borish, ularning samaradorligini baholash hamda asossiz olingan mablag'larni belgilangan tartibda qaytarib olish jarayonlarini yagona yondashuv asosida amalga oshirishga qaratilgan.

ASOSIY TUSHUNCHALAR

Tadbirkorlik subyektlariga subsidiyalar, imtiyozlar va preferensiyalar taqdim etilishini monitoring qilish, ularning samaradorligini baholash hamda asossiz olingan va maqsadsiz foydalanilgan subsidiyalarni qaytarib olishda quyidagi **asosiy tushunchalar** qo'llaniladi:

asossiz olingan subsidiya — subsidiya olish uchun soxta ma'lumot va hujjatlar taqdim etish orqali yoki mazkur subsidiyani qonunchilikda belgilanganidan boshqa yo'nalishlarda foydalanish uchun olish;

vakolatli organ — O'zbekiston Respublikasi Iqtisodiyot va moliya vazirligi;

imtiyoz — davlat tomonidan muayyan sabablarga ko'ra tadbirkorlik subyektlarini qo'llab-quvvatlash uchun ularga beriladigan afzallik;

ijtimoiy samaradorlik — ijtimoiy infratuzilma va tadbirkorlikni rivojlantirish, aholi turmush darajasini oshirish, uning ijtimoiy himoyasi va bandligini ta'minlash uchun qulay sharoitlar yaratilishini tasdiqlovchi imtiyozlar samaradorligi ko'rsatkichlari;

iqtisodiy samaradorlik — tadbirkorlik subyektlariga taqdim etiladigan subsidiya, imtiyoz va preferensiyalarning tadbirkorlik subyektlari faoliyatiga (ishlab chiqarish hajmining o'sishi va mahsulotlar (ishlar, xizmatlar) sotilishi, tannarx pasayishi, mahsulot (ish, xizmat) turlari kengayishi, daromadning oshishi va boshqalar) ta'sirini baholash;

maxsus vakolatli organlar — yengib bo'lmaydigan kuchlarning (fors-major holatlarining) bartaraf etilishi va tegishli xulosa taqdim etish uchun qonunchilik hujjatlari bilan vakolat berilgan davlat organlari;

maqsadsiz foydalanilgan subsidiyalar — qonunchilik hujjatlari hamda tuzilgan shartnomalarga (bitimlarga) muvofiq taqdim etilgan subsidiyani belgilanganidan boshqa maqsadlar uchun sarflash;

moliyaviy (budjet) samaradorlik — tadbirkorlik subyektlariga taqdim etiladigan subsidiya, imtiyoz va preferensiyalarning tadbirkorlik subyektining moliyaviy barqarorligi, sarmoyalarni jalb qilish imkoniyati oshishi hamda budjetga tushgan soliq va bojxona to'lovlari hajmining oshishiga ta'sirini baholash;

monitoring qilish — tadbirkorlik subyektlariga taqdim etiladigan subsidiya, imtiyoz va preferensiyalardan foydalanishni kuzatish hamda tahlil qilish jarayoni;

preferensiya — tadbirkorlik subyektlarining biror bir faoliyat turini qo'llab-quvvatlash uchun beriladigan ayrim turdagi afzallik;

Respublika komissiyasi — O'zbekiston Respublikasi Prezidentining 2024-yil 24-maydagi PQ-193-son qarori bilan tasdiqlangan Tadbirkorlik subyektlariga taqdim etiladigan subsidiyalar, imtiyozlar va preferensiyalarni maqbullashtirish hamda ularning samaradorligini ta'minlash bo'yicha respublika komissiyasi;

samaradorlik ko'rsatkichi — tadbirkorlik subyektlariga taqdim etiladigan subsidiya, imtiyoz va preferensiyalar natijasida erishiladigan ijtimoiy-iqtisodiy va moliyaviy ko'rsatkichlar;

samaradorlikni baholash — iqtisodiy, moliyaviy (budjet) va ijtimoiy samaradorlik ko'rsatkichlarini hisobga olgan holda, tadbirkorlik subyektlarini ularga taqdim etiladigan subsidiya, imtiyoz va preferensiyalar natijalarini taqqoslash tartib-taomillari;

samaradorlikni dastlabki baholash — tadbirkorlik subyektlariga subsidiya, imtiyoz va preferensiyalarni taqdim etadigan tashkilot tomonidan erishilgan natijalarni o'z vakolati doirasida tadbirkorlik subyektlari kesimida baholash;

samaradorlikni yakuniy baholash — tadbirkorlik subyektlariga taqdim etiladigan subsidiya, imtiyoz va preferensiyalarni vakolatli organ tomonidan samaradorlikni dastlabki baholash natijalari asosida ushbu Nizom talablari asosida baholash;

subsidiya — tovarlarni ishlab chiqarish, ishlarni bajarish, xizmatlar ko'rsatish va ularni realizatsiya qilishni moliyalashtirish yoki birgalikda moliyalashtirish yoxud maqsadli xarajatlarning o'rnini qisman qoplash uchun budjet tizimi budjetlari hisobidan yuridik va jismoniy shaxslarga beriladigan mablag'lar;

qo'llab-quvvatlash choralari — tadbirkorlik subyektlariga taqdim etiladigan subsidiyalar, imtiyozlar va preferensiyalar;

qo'llab-quvvatlash choralarining samaradorligi — qo'llab-quvvatlash choralaridan ko'zlangan maqsadga erishishning miqdoriy bahosi;

qo'llab-quvvatlash choralarini taqdim etadigan tashkilot — qonunchilik hujjatlariga muvofiq tadbirkorlik subyektlariga qo'llab-quvvatlash choralarini taqdim etish bo'yicha ijobiy yoki salbiy xulosani berish hamda ularning monitoringini yuritish va samaradorligini dastlabki baholash vakolatiga ega bo'lgan davlat organi.

QO'LLAB-QUVVATLASH CHORALARINI TAQDIM ETADIGAN TASHKILOTNING ASOSIY VAZIFA VA MAJBURIYATLARI

Qo'llab-quvvatlash choralari taqdim etadigan tashkilotning asosiy **vazifa va majburiyatlari**:

-  qo'llab-quvvatlash choralarining qonunchilik hujjatlariga muvofiq maqsadli taqdim etilishi;
-  tadbirkorlik subyekti tomonidan erishilishi lozim bo'lgan aniq maqsadli ko'rsatkichlarni belgilash;
-  qo'llab-quvvatlash choralari monitoringini yuritish va samaradorligini dastlabki baholash;
-  asossiz olingan va maqsadsiz, samarasiz yoki noqonuniy foydalanilgan subsidiyani majburiy tartibda tegishli budjetga qaytarilishini tashkil qilish.

Qo'llab-quvvatlash choralari taqdim etadigan tashkilotning asosiy **majburiyatlari** quyidagilardan iborat:

-  qo'llab-quvvatlash choralarining tegishli qonunchilik hujjatlarida belgilangan barcha talab va shartlarga mos keluvchi tadbirkorlik subyektlariga taqdim etilishini tashkil etish;
-  taqdim etilgan qo'llab-quvvatlash choralaridan tadbirkorlik subyektlari maqsadli foydalanishi hamda buning natijasida lozim bo'lgan aniq maqsadli ko'rsatkichlarga erishishini monitoring qilish;

📌 taqdim etilgan qo'llab-quvvatlash choralaridan tadbirkorlik subyektlari samarali foydalanishini tahlil qilish va samaradorlikni dastlabki baholash;

📌 qo'llab-quvvatlash choralaridan samarasiz hamda maqsadsiz foydalangan tadbirkorlik subyektlarining ro'yxatini shakllantirish;

📌 asossiz olingan hamda maqsadsiz foydalanilgan subsidiyani majburiy tartibda tegishli budjetga qaytarish choralarini ko'rish;

📌 iqtisodiyotga ijobiy ta'siri kuzatilmayotgan hamda samaradorligi past va samarasiz qo'llab-quvvatlash choralarining taqdim etilishini to'xtatish yoki bekor qilish yuzasidan takliflar tayyorlash;

📌 har yili 1-iyulga qadar tadbirkorlik subyektlariga taqdim etilgan qo'llab-quvvatlash choralari va ularning samaradorligini dastlabki baholash natijalari asosida hisobot tayyorlash hamda vakolatli organga taqdim etish

MONITORING QILISH



Qo'llab-quvvatlash choralarini taqdim etadigan tashkilot tadbirkorlik subyektlariga taqdim etgan qo'llab-quvvatlash choralari samaradorligini dastlabki baholash ishlarini ularga qo'llab-quvvatlash choralarini taqdim etishda belgilangan, tadbirkorlik subyektlari tomonidan erishilishi lozim bo'lgan aniq maqsadli ko'rsatkichlarning bajarilishini monitoring qilish orqali amalga oshiradi.



Zaruratga ko'ra, taqdim etilgan qo'llab-quvvatlash choralaridan maqsadli foydalanish holati joyiga chiqqan holda o'rganilishi mumkin. Bunda joyiga chiqqan holda o'rganish uchun tadbirkorlik subyektlari faoliyatini tekshirish tartibi doirasida **o'n kundan oshmagan** muddatda o'tkazishga tashabbus bildiriladi va o'rganish ishlari amalga oshiriladi.

Qo'llab-quvvatlash choralarini taqdim etadigan tashkilot tadbirkorlik subyektlariga subsidiyalar ajratish bo'yicha axborot tizimlarini vakolatli organning ["subsidiya.mf.uz"](https://subsidiya.mf.uz) platformasiga integratsiya qiladi.



Tadbirkorlik subyektlariga subsidiyalar ajratilishi “subsidiya.mf.uz” platformasi orqali monitoring qilinadi.

Tadbirkorlik subyektlariga qo'llab-quvvatlash choralari taqdim etishga asos bo'ladigan hujjatlarning to'g'riligi va haqqoniyligi, manfaatdor vazirlik va idoralar, jumladan, soliq va bojxona imtiyozlarini berish uchun asos bo'ladigan hujjatlarning (litsenziya, guvohnoma va boshqalar) to'g'riligi va haqqoniyligi **Soliq qo'mitasi** hamda **Bojxona qo'mitasi** bilan o'zaro idoralararo axborot almashinuvi orqali tasdiqlanadi.



Tadbirkorlik subyektlariga taqdim etilgan subsidiyalar qonuniy olingani, ulardan maqsadli va samarali foydalanish bo'yicha qo'llab-quvvatlash choralari taqdim etadigan tashkilot tomonidan doimiy monitoring yo'lga qo'yilib, subsidiya shartnomasiga (bitimiga) asosan erishilishi lozim bo'lgan aniq maqsadli ko'rsatkichlarga erishish nazorat qilib boriladi.

SAMARADORLIKNI BAHOLASH MEZONLARI

Qo'llab-quvvatlash choralari taqdim etadigan tashkilot qo'llab-quvvatlash choralari samaradorligini baholashda quyidagi mezonlardan foydalanadi:

(A) iqtisodiy samaradorlik:

- ✓ umumiy mahsulot (ish, xizmat) ishlab chiqarish hajmining oshishi;
- ✓ yangi turdagi mahsulot (ish, xizmat) ishlab chiqarish hajmining oshishi;
- ✓ mahsulotni (ishni, xizmatni) realizatsiya qilish bo'yicha aylanmaning o'sish sur'ati;
- ✓ mahsulot (ish, xizmat) turining kengayishi;
- ✓ yangi kashfiyot, patent va sanoat namunalarini miqdoriy ko'rsatkichlarda joriy etish;
- ✓ yangi texnologiyalar, uskunalar va ishlab chiqarish quvvatlarini (ishlab chiqarish korxonalari uchun) miqdoriy ko'rsatkichlarda joriy etish;
- ✓ tadbirkorlik subyektlarining daromadining (foydasining) oshishi;
- ✓ mahsulot (ish, xizmat) tannarxining pasayishi;
- ✓ eksport hajmining oshishi;
- ✓ shartnomaga (bitimga) asosan yordam berilishida maqsad qilingan boshqa iqtisodiy ko'rsatkichlarning oshishi;

(B) moliyaviy (budget) samaradorlik:

- ✓ tadbirkorlik subyektining moliyaviy barqarorligi;
- ✓ sarmoyalarni jalb qilish imkoniyatining oshishi;
- ✓ investitsiyalar hajmining oshishi;
- ✓ budgetga tushgan soliq va bojxona to'lovlari hajmining oshishi;

(V) ijtimoiy samaradorlik:

- ✓ yaratilgan yangi ish o'rinlari soni;
- ✓ ish haqini oshirish, qo'shimcha mablag'larning yo'naltirilishi;
- ✓ ijtimoiy yordamga muhtoj shaxslarni ish bilan ta'minlash;
- ✓ mehnat sharoitlari va mehnat muhofazasini yaxshilash;
- ✓ shartnomaga asosan yordam berilishida maqsad qilingan boshqa ijtimoiy ko'rsatkichlar.

ASOSSIZ OLINGAN VA MAQSADSIZ FOYDALANILGAN SUBSIDIYALARNI QAYTARIB OLISH TARTIBI

Tadbirkorlik subyektiga taqdim etilgan subsidiyalar quyidagi hollarda qaytariladi:



- ✔ subsidiya shartnomasi (bitim) bo'yicha tadbirkorlik subyektiga tomonidan erishish lozim bo'lgan aniq maqsadli ko'rsatkichlar bajarilmaganda; Bunda subsidiyalar shartnoma shartlarining bajarilmagan qismiga mutanosib tarzda qaytariladi.
- ✔ mablag'lardan maqsadsiz va samarasiz foydalanilgani aniqlanganda;
- ✔ subsidiya oluvchi tadbirkorlik subyektiga tomonidan tegishli hujjatlar yoki ma'lumotlarni noto'g'ri yoxud buzib ko'rsatish va asossiz olingani holatlari aniqlanganda.

Asossiz olingani yoki maqsadsiz foydalanilgani aniqlangan subsidiyalar quyidagi tartibda qaytariladi:



Qo'llab-quvvatlash choralari taqdim etadigan tashkilot tadbirkorlik subyektiga ajratilgan subsidiyani ixtiyoriy ravishda qaytarish to'g'risida **talabnoma** yuboradi.



Talabnomada quyidagi ma'lumotlar bo'lishi zarur:

- subsidiyaning asossiz olingani yoki undan maqsadsiz foydalanilganini asoslantiruvchi ma'lumotlar va hujjatlar;
- subsidiyaning qaytarib olinadigan summasi;
- subsidiyani qaytarish muddati. Bunda subsidiyani ixtiyoriy ravishda qaytarishning minimal muddati o'n ish kuni etib belgilanadi.

Tadbirkorlik subyeksi belgilangan muddatda talabnomada ko'rsatilgan subsidiyani qaytarmasa, subsidiya taqdim etgan tashkilot ajratilgan subsidiyani qaytarish to'g'risida sudga **da'vo arizasini** kiritadi.



Qo'llab-quvvatlash choralarini taqdim etadigan tashkilot taqdim etilgan qo'llab-quvvatlash choralaridan foydalanish natijadorligi to'g'risida qo'llab-quvvatlash choralari turi, tadbirkorlik sohalari kabi ma'lumotlarni rasmiy veb-sahifalari hamda ochiq axborot tizimlari orqali e'lon qilib boradi.

Qo'llab-quvvatlash choralarini taqdim etadigan tashkilotlar ushbu ma'lumotlarni "subsidiya.mf.uz" platformasiga elektron tarzda kiritib boradi.

YAKUNLOVCHI QOIDALAR

Qo'llab-quvvatlash choralari oluvchi tadbirkorlik subyektlari qo'llab-quvvatlash choralari taqdim etadigan tashkilotga o'z vaqtida ma'lumotlarni taqdim etmasligi yoki ishonchsiz va yolg'on ma'lumotlarni taqdim etganligi uchun amaldagi qonunchilik hujjatlariga muvofiq javobgar bo'ladi.

Qo'llab-quvvatlash choralari oluvchi tadbirkorlik subyektlariga qonunchilik hujjatlariga muvofiq javobgarlik choralari qo'llanishi ularni qo'llab-quvvatlash choralari taqdim etadigan tashkilotga ma'lumot taqdim etish majburiyatidan ozod qilmaydi.

Qo'llab-quvvatlash choralari taqdim etadigan tashkilot o'ziga berilgan vakolatlarni amalga oshirishi munosabati bilan ma'lum bo'lgan tijorat siri yoki qonunchilik bilan qo'riqlanadigan boshqa sirlarni tashkil etuvchi ma'lumotlarni oshkor qilishga haqli emas.

**Tadbirkorlik subyektlariga subsidiyalar, imtiyozlar va preferensiyalar
taqdim etilishini monitoring qilish va ularning samaradorligini
baholash hamda asossiz olingan va maqsadsiz foydalanilgan
subsidiyalarni qaytarib olish**

SXEMASI

Bosqichlar	Subyektlar	Chora-tadbirlar	Muddatlar
1-bosqich	Mas'ul vazirlik va idoralar	1. Har bir turdagi subsidiya, imtiyoz va preferensiyalar (keyingi o'rinlarda — qo'llab-quvvatlash choralari) taqdim etilishini alohida monitoring qilish va ularning samaradorligini baholash hamda asossiz olingan va maqsadsiz foydalanilgan subsidiyalarni qaytarib olish tartibini ishlab chiqadi. 2. Iqtisodiyot va moliya vazirligi, Savdo-sanoat palatasi hamda Tadbirkorlik subyektlarining huquqlari va qonuniy manfaatlarini himoya qilish bo'yicha vakil bilan kelishgan holda tartibni tasdiqlaydi, rasmiy veb-sahifasiga joylashtiradi.	2026-yil 1-mart <i>(yangi turdagi qo'llab-quvvatlash choralari joriy etilganda)</i>
2-bosqich	Mas'ul vazirlik va idoralar	Barcha qo'llab-quvvatlash choralari haqidagi ma'lumotlarni "subsidiya.mf.uz" platformasidagi reyestrda kiritadi.	2026-yil 1-mart
3-bosqich	Mas'ul vazirlik va idoralar	1. Qo'llab-quvvatlash choralarining har bir turi bo'yicha tizimli monitoring qilish va samaradorligini dastlabki baholash ishlarini amalga oshiradi. 2. Qo'llab-quvvatlash choralarining har bir turi bo'yicha samaradorlikni dastlabki baholash natijasida tayyorlangan hisobotni Iqtisodiyot va moliya vazirligiga kiritadi.	Har yili 20-iyunga qadar Har yili 1-iyulga qadar

4-bosqich	Raqobatni rivojlantirish va iste'molchilar huquqlarini himoya qilish qo'mitasi	1. Qo'llab-quvvatlash choralarining sog'lom raqobat muhitiga ta'sirini baholaydi. 2. Baholash natijasida tayyorlangan hisobotni Iqtisodiyot va moliya vazirligiga kiritadi.	Har yili 20-iyunga qadar Har yili 1-iyulga qadar
-----------	--	---	--

5-bosqich	Iqtisodiyot va moliya vazirligi, Hisob palatasi	1. Mas'ul vazirlik va idoralar tomonidan qo'llab-quvvatlash choralari samaradorligini dastlabki hamda raqobat muhitiga ta'sirini baholash natijalari bo'yicha taqdim etilgan hisobotlarga asosan ijtimoiy-iqtisodiy rivojlanish va budgetga ta'sirini tahlil qiladi hamda yakuniy baholaydi. 2. Qo'llab-quvvatlash choralarining samaradorligini baholash yakunlari bo'yicha Tadbirkorlik subyektlariga taqdim etiladigan subsidiyalar, imtiyozlar va preferensiyalarni maqbullashtirish hamda ularning samaradorligini ta'minlash bo'yicha respublika komissiyasiga axborot kiritadi.	Har yili 1-avgustga qadar
-----------	---	--	---------------------------

6-bosqich	Tadbirkorlik subyektlariga taqdim etiladigan subsidiyalar, imtiyozlar va preferensiyalarni maqbullashtirish hamda ularning samaradorligini ta'minlash bo'yicha respublika komissiyasi	Qo'llab-quvvatlash choralarining samaradorligini baholash yakunlari bo'yicha ma'lumotnomani hamda ushbu choralarning amal qilishini davom ettirish, bekor qilish yoki ularni taqdim etish tartibini takomillashtirish haqidagi takliflarni O'zbekiston Respublikasi Prezidenti Administratsiyasiga kiritadi.	Har yili 1-oktabrga qadar
-----------	---	--	---------------------------

7-bosqich	Mas'ul vazirlik va idoralar	Tadbirkorlik subyektlariga taqdim etilgan subsidiyalarning maqsadli foydalanilishi hamda asosli olinishi yuzasidan monitoring olib boradi.	Doimiy ravishda
8-bosqich	Mas'ul vazirlik va idoralar	Tadbirkorlik subyektiga ajratilgan subsidiyani ixtiyoriy ravishda qaytarish to'g'risida talabnoma yuboradi.	Subsidiyadan maqsadsiz foydalanilgani yoki asossiz olingani aniqlangan taqdirda
9-bosqich	Tadbirkorlik subyekti	Maqsadsiz foydalanilgan yoki asossiz olingan subsidiyani qaytaradi.	Talabnomada ko'rsatilgan muddatda
10-bosqich	Mas'ul vazirlik va idoralar	Tadbirkorlik subyekti belgilangan muddatda talabnomada ko'rsatilgan subsidiyani qaytarmaganda, ajratilgan subsidiyani qaytarish to'g'risida sudga da'vo arizasini kiritadi.	Talabnomada ko'rsatilgan muddatda qaytarilmagan taqdirda